

Home > ARNAUT DANIEL > EDIZIONE > En cest sonet coind'e leri > Tradizione manoscritta > CANZONIERE A > Edizione diplomatico-interpretativa

## Edizione diplomatico-interpretativa

|                                                                                                                                                                                                                                            |                                                                                                                                                                                                                                                  |
|--------------------------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------|
| <p>Arnautz daniels.<br/>En cest sonet coind eleri. Fauc motz<br/>ecapuig edoli. Que serant uerai e<br/>cert. Qan naurai passat la lima. Qua<br/>mors ma deplan edaura. Mon chantar<br/>q(ue) de liei mou. Q(ue) pretz manten egouerna.</p> | <p>Arnautz Daniels.<br/>En cest sonet coind e leri<br/>Fauc motz e capuig e doli<br/>Que serant verai e cert<br/>Qan n'aurai passat la lima<br/>Qu'amors m'a de plan e daura<br/>Mon chantar que de liei mou<br/>Que pretz manten e governa.</p> |
| <p>Mil messas naug enproferi. enart lum<br/>de cera .....</p>                                                                                                                                                                              | <p>Mil messas n'aug e.n proferi<br/>E n'art lum de cera e d'oli<br/>Que dieus m'en don bon issert<br/>De lieis on no.m val escrima<br/>E qand remir sa crin saura<br/>E.l cors q'a graile e nou<br/>Mais l'am que qi.m des luserna.</p>          |
|                                                                                                                                                                                                                                            | <p>Tant l'am de cor e la queri<br/>C'ab trop voler cuig la.m toli<br/>S'om ren per ben amar pert<br/>Lo sieus cors sobretracima<br/>Lo mieu tot e non si saura<br/>Tant ai de ver fait renou<br/>C'obrator n'ai e taverna.</p>                   |
|                                                                                                                                                                                                                                            | <p>Tot iorn meillur et esmeri<br/>Car la gensor serv e coli<br/>Del mon so.us dic en apert<br/>Sieus suis del pe tro c'en cima<br/>E si tot venta.ill freidura<br/>L'amors q'inz del cor me mou<br/>Mi ten chaut on plus iverna.</p>             |
|                                                                                                                                                                                                                                            | <p>Ges pel maltraich q'ieu soferi<br/>De ben amar no.m destoli<br/>Liei anz dic en descobert<br/>Car si.m fatz los motz en rima<br/>Pieitz trac aman c'om que laura<br/>C'anc plus non amet un ou<br/>Cel de Moncli N'Audierna.</p>              |

|  |                                                                                                                                                                                                                  |
|--|------------------------------------------------------------------------------------------------------------------------------------------------------------------------------------------------------------------|
|  | Non vuoill de Roma l'emperi<br>Ni c'om mi fassa apostoli<br>Q'en lieis non aia revert<br>Per cui m'art lo cors e.m rima<br>E si.l maltraich no.m restaura<br>Ab un baissar anz d'an nou<br>Mi aucì e si enferna. |
|  | Ieu sui Arnautz q'amas l'aura<br>E chatz la lebre ab lo bou<br>E nadi contra suberna.                                                                                                                            |

- letto 2205 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/edizione-diplomatico-interpretativa-56>